

NAQQIUT

Taarserpaa akissuteqaat 7. Maj 2024-meersoq
(Oqaaseqatigiit tallimaat nutarsarneqarpoq)

Timersornermik pingaartitsinerput, timersornermullu aningaasaliissuteqartarnerput naammaginarsoq naammaginanginnorsorluunniit pillugu apeqquteqaat aallaavigalugu oqallinneq.

(Inatsisartunut ilaasorta Peter Olsen. Inuit Ataqatigiit)

Akissuteqaat

(Meeqqanut, Inuusuttunut, Ilinniartitaanermit, Kultureqarnermut, Timersornermut Ilageeqarnermullu Naalakkersuisoq)

Naalakkersuisut qutsavigiumavaat Inatsisartunut ilaasorta Peter Olsen, Inuit Ataqatigiit, timersornermik pingaartitsinerput, timersornermullu aningaasaliissuteqartarnerput naammaginarsoq naammaginanginnorsorluunniit pillugu apeqquteqaat aallaavigalugu oqallisissiaanik.

Naalakkersuisut timersorneq tapersorsorluinnarpaat, tulleriarinerminnilu pingaartitarilluinnarlugu, timersornermi tassaamat inuiaqatigiit sutigut tamatigut peqqissumik toqqissimasumillu inuunerannut ilaalluinnarmat, taamatullu imigassamut, aannajaarniutinut atonerluisarnermut pinerlunniartarnermullu pinaveersaartitseqataasuummat.

Naalakkersuisut timersornermut tapersersuisutut kisimiinngillat. Kommunit inatsisitigut pisussaaffeqarnerup saniatigut sulilluarnermikkut inuiaqatigiit akornanni timersornerup aallunneqarluarneranut siuarsarneqarneranullu ingerlatsilluattuupput. Suliffeqarfiit namminersorlutillu inuussutissarsiortut aamma timersornermut annertuumik tapersersuisuupput. Peqatigiiffinnut amerlasuunut aamma timersoqatigiiffiit kattuffiinut pisortat aningaasaliissutaannut naammattuaannangitsunut sponsoriusarnermikkut aningaasanik pisariaqartinneqartunik aamma tapersersuisuusarmata. Kommunit, suliffeqarfiit, namminersorlutillu inuussutissarsiortut tapersersuinerannut nersualaarinninnermik tamakkiisumik Naalakkersuisut apuussaqaarfigerusuppaat.

Naalakkersuisut Kalaallit Nunaanni Timersoqatigiit Kattuffiat aamma Elite Sport Greenland angusaqarnissamut isumaqatigiissuteqarput piffissamut 2023-2027-imut, Timersorneq timigissarnerlu pillugit Inatsisartut inatsisaanni ulloq 6. juni 2015-imeersoq naapertorlugu. Angusaqarnissanut isumaqatigiissut ataatsimoorussamik aqutsinermit illuatungeriit akornanni sakkuvuq, siunertaqarlunilu qularnaarinissamik suleqatigiittoqarnissaanik Naalakkersuisut naalakkersuinikkut tulleriarineranni aamma Kalaallit Nunaanni timersoqatigiit kattuffiata akornanni illuatungeriit ingerlatsinissanut isumalluarnemat, matumani aamma angusassanut piumasqaatit, nalunaarusiortarneq naatsorsuusiortarnerlu eqqarsaatigalugit tunngaviusussat aalajangersaavigineqartarnerisigut. Angusaqarnissamullu isumaqatigiissutikkut ilaatigut

Naalakkersuisut Timersoqatigiit Kattuffiata takorluugai anguniagaalu tapersorsorpaat – Kalaallit Nunaata 2030-imi nunarsuatsinni timimik aalatitsinerpaatut inissisimassasoq.

Naalakkersuisut tapiissuteqartarput inuit tamat timigissartarnerannut Aningaasanut inatsimmi Timersoqatigiit Kattuffiannut timersornermut kontumi pingaarnermi 40.94.13

Timersornermut tapiissutitigut. Tamatumani immikkoortitsisoqarpoq 18.160 mio. kr.-inik aningaasat ukiuannut 2025-imut, aammalu ukiunut missingersuusiorfiusunut 18,2 mio. kr.-inik. Elite Sport Greenland-imut tapiissuteqartoqartarpoq, siunertaqartunik nunatsinni timersornerup nunarsuarmiunut unammillersinnaassusiata siuarsarneqarnissaannik, minnerunngitsumik nunat tamalaat akornanni pikkorivissut timersortarnerat - eliteidræt – katersuuttarnerini peqataasarnernut. Tamatumani immikkoortitsisoqarpoq 1.2 mio. kr.-inik aningaasat ukiuannut 2025-imut, aammalu ukiunut missingersuusiorfiusunut 1.2 mio. kr.-inik.

Tamatumalu saniatigut Timersoqatigiit Kattuffiat aamma Elite Sport Greenland pissarsisarput Danske Spil A/S-imi kaaviiartitaanit aningaasaliiffigineqartarput. Aningaasaliissutinik immikkoortitsisoqarpoq 20.952 mio. kr.-inik Timersoqatigiit Kattuffiannut, GIF-imut aamma 3.813 mio. kr.-inik Elite Sport Greenland-imut ukiumut aningaasanut inatsiseqarfiusumut 2025 kontumi pingaarnermi 40.94.21, Danske Spil A/S-imi kaaviiartitanit Kalaallit Nunaata pisasaanit tapiissutit.

Timersoqatigiit kattuffiata aningaasaliissutit timersornermi kattuffinnut ataasiakkaanut agguaattarpai agguaassisarnermut maleruagassat atuuttut naapertorlugit. Agguaassisarnermut maleruagassat Timersoqatigiit Kattuffianni aalajangersarneqartarput, agguaassisarnermillu aaqqissuussineq atuuttoq siunertaqarluni patajaatsunik tunngavissaqartitsisoqarnissaannik pitsaasumik ineriartortitsisoqarnissaanut kattuffinni immikkoortuni pineqartuni, aaqqissuussinerlu qularnaarisussaavoq kattuffiit aamma Timersoqatigiit Kattuffiata ataatsimoorussanik annertuuni pilersaarutaasunik piviusunngortitsisinnaanissaannik.

Timersoqatigiit kattuffiat aamma Elite Sport Greenland timersornermik ingerlatsinermik aaqqissuussisartutut qitiusutut kissaatiminnik saqqummiussinikuupput, aningaasaliissutaasartut malunnaatilimmik amerlineqartariaqarnerat pillugu siuliani eqqaaneqareersutut inatsisit naapertorlugit pisussaaffiusut tamakkiisumik piviusunngortinneqarsinnaassappata.

Tamatumalu saniatigut Timersoqatigiit Assammik Arsartartut Kattuffiat (TAAK) 2023-imi aningaasanut inatsisikkut immikkut ittunik ilassutitut aningaasaliiffigineqarput. Aningaasaliissutit annertussusilerneqarput TAAK-ip qinnuteqaataa tunuliaqutaralugu, tapiissutillu taakkua atorneqarlutik Amerikap Avannaani Arnat assammik arsartartut (NORCA) VM-imut anngunniunnermut atatillugu Nuummi unammersuaarnerannut.

Naalakkersuisut kissaateqarput timersornerup silarsuaani pissutsit atugassarititaasullu pitsaanerunissaannik. Tamatigut ajornaatsuinnaasangilaq ullutsinni aningaasaqarnikkut killiliussat naammassinnaanerat timersornerup silarsuaani ingerlatsisut kissaataasa piviusunngortinniartarneranni. Taamaattumik pisariaqartitsisoqarpoq nunatsinni

timersornermik ingerlatsinernut aningaasaliissutaasartut malunnaatilimmik amerlanerunissaat, nunatsinni timersorneq ulluni maanna atuuttuni nutaaliaasuni atugassarititaasunut sukkasuumik ineriartorfiusuni piumasaqaatinut malinnaasinnaassappat.

Taamatut oqaaseqarluta Naalackersuisuni qilanaaraarput inimi maanna soqutiginartumik oqallittoqarnissaa.